

1 Tesalonaika

Tesalonaika niŋ Yesuyen alya bereya hitte Pol belen mehenɗe asan kayyin

1 ¹Be, ne Polya meten kadne waran Sailasya Timotiya belen den Yesu Kristuyen alya bereya sios Tesalonaika taunde han kurun goke ten asan gago kan hite. Denbe Adoninin Al Kurunya Doyan Al Kurunninin Yesu Kristuya han. Ningeb Al Kurun belen buninɗen dirde igin igin dirde huginɗen bitin yisikamke igin hiwon yen nurde hite.

Tesalonaika taunde nin mar goke ten Al Kurun nin amanɗen nurd unyin

²Be, nenbe huginɗen den ge Al Kurun mere irde hityen. Irde den ge ten igin nurde unen turun irde hityen. ³Denbe Al Kurun nin hekkeɗen nurde henya meten ten hinhan. Irde bitinde mat wor po yenna alya bereya nin amanɗen nurde hinhan geb, Nanninin Al Kurun mere irde henyaɓe meten dunyin kurun goyen kenkela po pasi irnin yen kurut yen hinhan goyen goke bininin sir ma yen hiyen. Irdeb Doyan Al Kurunninin Yesu Kristu kame mulgan hen wakeɓ yenna tumnan hitek yen nurde hinhan geb, Al Kurunyen mere gama irde kanduk karkuwan yenen hinhan gega, goke mukku ma ten goya goya sanɗen hen hinhan goyen goke wor bininin sir ma yen hiyen.

⁴Ningeb, kadne yago, mata gwahade goyen tumnan yintirin geb, fudinde Al Kurun belen den goyen bubulkuɗne wor po yen nurde dunenbe dirinne wen dinen basina diryin yen nurtirin. ⁵Nen belen den ge ten kun denya hen mata ten hinhet kurun gobe kenkela nurde han gogo. Hanƙapya den hitte gor kun Yesu nin yitin mere igin goyen tagalde hinhet goya goyenbe mere ulin po mon, Al Kurunyen tareɗ manan kenamin. Irde Holi Spirit belen bitinde meten kurun wor po tikeɓ mere tagaltirin gobe fudinde wor po yen nuramin.

⁶Be, nenya Doyan Al Kurunya kanduk yintirin gwahade goyen po, den wor Al Kuruyen mere nin igin ma nurde han mar belen bulun bulun dirde hinhan. Gega Hol Spirit belen aman dufay dunkeb mere goyen fudinde yen amanen nurde ten bitinde kerde gama irde hinhan. ⁷Ningeb Masedonia nana den hande gorya Akaiya nana nen hitere gaya nin Yesuyen alya bereya belen den mata ten hinhan go nurdeb, “Yesuyen alya bereya belen mata ten hitekbe gwahade,” yen nurdeb matatin goyen po gama irde hanjen. ⁸Fudinde wor po, den belen Doyan Al Kurun nin yitin mere goyen nurdeb Al Kurun nin dufaytin tarej iramin goyen nuramin marbe Masedoniaya Akaiya nana bana ga nin mar po mon. Doyan Al Kuruyen mereya den mata tiyamin gote mere momonyabe nana hoyande nin mar manan tumnan nurtin ala tiyamin. Ningeb goke nen belen den ge al hoyan momon yirtek yen ma nurde hite. ⁹Gobe mere momontin nuramin mar belen wanbe den belen mereninin fudinde yen nurdeb igin igin dirde hinhan goyen tagalamin, irde den belen det tonen al belen yirtin goyen dolon yirde hinhan goyen daha mat yubul tenbe Al Kurun fudinde hi goyen hitte wan yen po dolon irde metenmin ten hinhan goyen wor tagalamin geb, matatin goke gwaha kura yetek yen ma nurde hite. ¹⁰Irde Al Kurun Urmin Yesu, Al Kurun belen kamtinde mat isan hirin al goyen Al Kuruyen gasunde mat mulgan hiyyen yen doyan irde hanjen mere momon goyen manan tagalamin. Ningeb goke nen belen gwaha kura yetek yen ma nurde hite. Fudinde, Yesube nen dumulgan tiyyin geb, kame Al Kurun belen alya bereyat mata bulun gote murungem bulun yunyen nalure goyenter nenbe murungem bulun goyen go ma dunyen.

Polyen mata

2 ¹Be, kadne yago, nen belen den hitte kun meten ten hinhet gobe duldul ma meten ten hinhet goyen nurde han gogo. ²Irde den hitte ma kutirinya mehenbe Filipai taunde dahade hinhet goyen wor nurde hanjen. Gor nin mar gore Al Kuruyen mere nin igin ma nurdeb dinen ten sukal dirde bulun bulun dirke ulninin misin kattirin. Gega goke kafura ma hitirin. Irde gor mat den hitte kun Al Kuruyen mere tagaltirin goyenbe gor nin mar wor Al Kuruyen mere goke igin ma nurde asogo diramin. Goyenpoga Al Kuruninin belen faran durke goke kafura ma hen kawan po momon dirde hinhet. ³Gobe mere tagalde hinhet goyen usi dirhet nenya ma dinen hinhet, irde gwaha yinteke turun dirde igin igin dirnan yen nurde ga ma dinen hinhet, irde mere gote min kenkela nurdeya ga saba dirde hinhet geb, gogo kafura ma hen kawan po momon dirde hinhet. ⁴Irde Al Kurun belen, “Mel gabe mere igin Yesu nin yitin goyen fudinde igin mat tagalde tukunayin,” yen nurdeb meten gago dunyin geb, dufaymin po gama irde meremin tagalde hityen.

Ningeb meten ten hityen gabe al bele ten denen amaten nurd dunnan yen ma meten ten hityen. Gwaha titin yarab dufayninin kenkela yenen hi al Al Kurun gore denen amaten nuryen yen meten ten hityen. ⁵Irdeb dindiken denen hinhan gwahade goyen po, merebe kirmintin po hapek yan nurnayin yen ma tagalde hinhet. Irde sabaya mataya ten henyabe bininin den bele igin igin dirde det dunnayin dufay bulun gwahade goyen bana kerde henya ma meten ten hinhet. Hubu wor po. Al Kurunbe nurde dunen hi. ⁶Nenbe al bele turun dird dird nin ma nankenen hinhet. Den bele daw ma al hoyan bele daw turun dirwon yen ma nurde hinhet.

Fudinde, nenbe Yesu Kristuyen mere basan mar geb, igin gwaha gwaha dirnan dintewon. ⁷Goyenpoga gwaha ma dinenbe dirin kura milin bele kenkela doyan irde okko irde hien go gwahade goyen po bekenge mere dirde doyan dirde hinhet. ⁸Nenbe gwaha mat bininin mat wor po den ge amaten nurde hinhet. Irdeb dirin kura nanin bele gone mun yen nurde hien gwahade goyen nen bele den ge amaten nurde hinhet. Ningeb Al Kurun bele mere igin Yesu nin yitin dunyin goyen momon dird dird nin amaten nurde hinhet. Irde den ge ten kamtek wor igin yen nurde hinhet. ⁹Ningeb, kadinin yago, nenbe gwahade nurde hinhet geb, Al Kurun bele Yesu nin yitin mere igin dunyin goyen den hitte tagalde hinhetyabe den hantin doyan po ma hinhet. Mongo den po kanduk kurun duntek goke tenbe wawunya nan kahalya nindiken ge nurdeb hora meten kurun po ten hinhet. Ningeb denbe nen meten kurun gwahade ten nufol durde hinhin gobe bitin sir ma yen hi yen nurde hite.

¹⁰Be, nenbe den Al Kurun nin dufaytin sanin irtin marya hen mata igin Al Kurun dilinde wukken, irde huwak wor po goyen ten hiteke al bele gwaha mat kura tagal duntek mon hinhet goyen dindiken den hinhan. Irde Al Kurun wor den hinhin geb, ga dinen hime gayenbe fudinde yen nurde hi. ¹¹Nenbe den nurde hanen gwahade goyen po, nenbe al kura dirnen wen kenkela doyan yirde hien gwahade goyen dirde hinhet. ¹²Gwaha dirde henyabe mata igin ten ten dufaytin taren irde kanduk yenen hike bitin yurum yirde hinhet. Irde mata Al Kurunyen alya bereya bele titek goyen po ten hinayin yen taren po mere dirde hinhet. Al Kurunbe den goyen alya bereyamin doyan yird yird bana hurkun saninmin turun yan kenen hitin han goyen kame wor gwahade po titek mar henayin yen hoy dirde hi.

¹³Be, nen bele den ge ten Al Kurun igin nurde unen hityen gote min hoyan kurabe nen bele Al Kurunyen mere momon dirtekeb, “Mere dirde han gabe fudinde Al Kurunyen mere, mali mere mon,” yen nurde hinhan. Ningeb goyen goke manan Al Kurun igin nurd unen hityen. Fudinde wor po, saba dirde hinhet gobe Al Kurunyen mere, den Yesu nin dufaytin taren irde han mar bana meten ten hi mere go goyen. ¹⁴Fudinde, kadne

yago, denbe Yudia nanare niŋ Al Kurunyen sios Yesu Kristuya haŋ mar kanduk yeneŋ hinhan gwahade goyen po, den wor kanduk yeneŋ hinhan. Mel gobe nanamde niŋ mar belen buluŋ buluŋ yirde hinhan gwahade goyen po, den wor dende nanare niŋ mar belen buluŋ buluŋ dirde hinhan. ¹⁵Munan Yudia nanare niŋ mar gobe Doyaŋ Al Kurunyniniŋ Yesu mayamiŋ. Irde neŋ wor buluŋ buluŋ dirde dakira tiyamiŋ. Bikenŋ asem yago wor Al Kurunyen mere basaŋ mar porofet gasa yirde hinhan. Mel gobe al miŋ hoyanŋa awalikde hitek ma yirde hikeb mata gwahade teŋ hanŋen gogo. Irkeb Al Kurun belen goke igiŋ ma nurd yunen hinhin. ¹⁶Go mar gobe al miŋ hoyan Yuda mar moŋbe epte ma Al Kurunyen dirneŋ weŋ henayiŋ yeŋ nurde hanŋen. Ningeb neŋ belen al miŋ hoyan hitte kuŋ Al Kurunyen dirneŋ weŋ heŋ heŋ belneŋ goyen tagalde hitekeb igiŋ ma nurde meteniniŋ walde hanŋen. Mata buluŋ gwahade tike kuŋ kuŋ kurun wor po hekeb Al Kurun belen yeneŋ wasak titek moŋ geb, Al Kurunyen bearar bana po haŋ.

Polbe Tesalonaika niŋ mar kuŋ yenmewoŋ yeŋ nurde hinhin

¹⁷Be, kadne yago, neŋ gayenterbe al kura dirneŋ weŋ miŋyan goyen bur yirtiŋ yara diramiŋ geb, belneŋeŋ po hoyan hoyan hite. Gega dufayniniŋdebe den ge hugineŋ nurde hityen. Ningeb daha mat kura araneŋ kuŋ dentewoŋ yeŋ nurde kurut wor po yeŋ hinhet. ¹⁸Fudinde wor po, ne Polbe kuŋ dentek wor po nirde hiyen. Goke teŋbe den hitte kuŋ kuŋ niŋ kurut wor po yeŋ hinhem. Gega Satan belen, “Mel gore daha kuŋ tareŋ yirnayiŋ,” yeŋbe belen pet dirde hinhin.

¹⁹Be, kame Doyaŋ Al Kurun Yesu wakeb diliŋ mar huwardeb da ikala irniŋ? Neŋ belen ikala irtek detbe den gogo po geb. Neŋ belen den goyen Al Kurun diliŋde saŋiŋ heŋ heŋ ge doyaŋ heŋ hityen, irde den ge dufay heŋbe amaneŋ nurde hityen. Irde denbe meteniniŋ gote igineŋ geb, goke teŋbe Yesu belen deŋe turunŋ yaŋ dunyeŋ. ²⁰Fudinde wor po, den ge teŋ meten teŋ hinhet goke Doyaŋ Al Kurun belen deŋe turunŋ yaŋ dunyeŋ. Ningeb goke teŋbe den ge amaneŋ wor po nurde hityen.

Pol belen Timoti teŋ kerke Tesalonaika kuriŋ

3 ¹Ningeb Atens taunde gar hinhetyabe araneŋ den hitte mulgan hetek wor po dirde hinhin. Gega neŋ tumŋan kuŋ kuŋ gobe meteneŋ dirkeb mere sege irde Sailasya neyabe Atens taunde hirekeb ²Timoti po den hitte kuyeŋ yitiriŋ. Timotibe Al Kurunyen diriŋ, denŋa neŋya yara po. Yeŋbe neŋya Yesu niŋ yitiŋ mere igiŋ goyen tagalde tukun hityen. Ningeb yeŋ belen kuŋ dufaytiŋ Yesu Kristu niŋ tareŋ iramiŋ goyen faran durkeb sopte dindiken dufaytiŋ goyen tareŋ po irnayeŋ yeŋbe gogo teŋ kermeke kuriŋ. ³Moŋgo kanduk yeneŋ hinhan gore dirke Yesu harhoktiŋ unnak yeŋbe gogo Timoti teŋ kermeke kuriŋ. Neŋ Yesuyen alya bereyabe

kanduk gwahade po yeneŋ hitek geb, gogo deŋ wor kanduk yeneŋ hinhan goyen deŋbe kenkela nurde haŋ. ⁴Niŋgeb neŋbe deŋya hinhetyabe, “Al beleŋ buluŋ buluŋ dirke kanduk yentek geb,” dinen tebaŋ dirde hinheth gogo. Niŋgeb gwahade po forok yeke yenamiŋ nurde haŋ gogo. ⁵Niŋgeb goke teŋbe deŋ hitte mulgaŋ heŋ kuniŋ yeŋ hinheth goyen kuŋ ulyaŋde po hekeb Yesu niŋ dufaytiŋ saŋiŋ po irde haŋ ma dahade goyen bebak tiye yeŋbe Timoti gogo teŋ kermeke kuriŋ. Moŋgo Satan beleŋ dufay buluŋ duneŋ usi dirkeb Yesu gama ird ird mata tubul tikeb meteŋniniŋbe iginen ga moŋ hiyyeŋ yeŋ galgalneŋ nurdeb gogo Timoti teŋ kermeke kuriŋ.

Timotibe Pol hitte mulgaŋ hiriŋ

⁶Be, Timoti deŋ hitte kuriŋ goyen mulgaŋ heŋ waŋ forok yiyuŋ. Irdeb deŋbe Yesu niŋ dufaytiŋ tareŋ po irde haŋ irde bitiŋde mat wor po Yesuya al hoyanya niŋ amaneŋ nurde haŋ mere momoŋtiŋ igiŋ goyen momoŋ diruŋ. Irde neŋ beleŋ deŋ dentek nurde hite gwahade goyen po, deŋ wor neŋ ge bitiŋ sir ma yeke dentewoŋ wor po yeŋ nurde haŋ goyen momoŋ diruŋ. ⁷Niŋgeb, kadne yago, dufaytiŋ Doyaŋ Al Kuruŋ niŋ tareŋ iramiŋ mere momoŋ goyen nurdeb amaneŋ wor po nurtiŋ. Niŋgeb meteŋ teŋ hitekeya al beleŋ buluŋ buluŋ dirke kanduk yeneŋ ulniniŋ misiŋ kateŋ hityen goke ma nurtiŋ. Irde gayenter manaŋ gwahade po nurde hite. ⁸Fuinde wor po, deŋbe Doyaŋ Al Kurunya heŋ saŋiŋ heŋ haŋ geb, neŋbe goyen nurde goke amaŋ niŋ pultik wor po yeŋ hite. ⁹Niŋgeb Al Kuruŋ diliŋde huwarde mere irde heŋya deŋ ge teŋ Al Kuruŋ igiŋ nurd uneŋ uneŋ gobe ep gago yetek moŋ yeŋ nurde hite. ¹⁰Irdeb Yesu niŋ dufaytiŋ tareŋ ird ird matatiŋ kura tareŋ moŋ kenem nindiken kuŋ denenbe saba dirde saŋiŋ dirtek yeŋ nurdeb bininiŋde mat wor po naŋkahalya wawunya hugiŋeŋ Al Kuruŋ gusuŋaŋ irde hite.

¹¹Be, Nanniniŋ Al Kuruŋ yiŋgeŋya Doyaŋ Al Kuruniniŋ Yesuya beleŋ deŋ hitte kuŋ kuŋ beleŋ goyen kerde dunkeb kutewoŋ yeŋ nurde Al Kuruŋ gusuŋaŋ irde hite. ¹²Irde bininiŋde mat deŋ ge amaneŋ nurde hityen gwahade goyen po, deŋ wor kadtiŋ yagoya al hoyan kuruŋ goyen goke manaŋ bitiŋde mat amaneŋ nurd nurd mata goyen Doyaŋ Al Kuruŋ beleŋ kuruŋ po irwoŋ yeŋ nurde hite. ¹³Irdeb yeŋ ge po dufaytiŋ tareŋ irwoŋ yeŋ nurde hite. Gogab kame Doyaŋ Al Kuruŋ Yesu goyen miyoŋminiŋya tumŋaŋ mulgaŋ heŋ heŋ natureb deŋbe Al Kuruniniŋ diliŋ mar huwarkeb yeŋ beleŋ al wukkek, uliŋde merem moŋ yeŋ dinyeŋ.

Al Kuruŋ beleŋ amaneŋ nurtek mata po teŋ hinayiŋ

4 ¹Niŋgeb, kadne yago, deŋ mata gwahade teŋ hite Al Kuruŋ beleŋ igiŋ dinyeŋ yeŋ saba dirde hinheth. Irdeb gayenter wor gama irde haŋ. Niŋgeb Doyaŋ Al Kuruŋ Yesuya heŋ kadtiŋ yago hitiŋ hite gare matatiŋ igiŋ goyen kuŋ kuruŋ heŋ hiyeŋ yeŋ gago gusuŋaŋ dirde tebaŋ

dirde hite. ²Denbe gwaha gwaha tej hinayin yey nen beley Doyan Al Kurunyen tarende saba dirde hinhet goyen nurde han.

³Saba goyen gama irde mata tej Al Kurun dilingde wukkek hen hen gobe Al Kurunyen dufay geb, alya bereya leplep mata ma tej hinayin. ⁴Irde den dunjure dunjure ultin po aman hetek mata bulun tej tej belnen pet tej hinayin, irde Al Kurun dilingde wukkek al hoyan wor denen palap dirtek mata tej tej nin tunan urde hinayin. ⁵Al Kurun nin ma nurde megen nin mata po gama irde han mar beley bin harke go po gama irde han yen yara ma tej hinayin. ⁶Ningeb al kura mata gwahade goyenter kadomde berem leplep irde kadom bulun ma iryen. Gwaha tinayinbe bikken nen beley saba dirde hayhay dirde hinhet gwahade goyen po, Doyan Al Kurun beley mata buluntin goke bulun wor po diryen. ⁷Gobe Al Kurunbe mata bulun tej hinayin yey hoy dirtinjenbe mata igin Al Kurun dilingde wukkek goyen tej hinayin yey hoy diryin geb, gogo mata buluntin goke bulun wor po diryen. ⁸Ningeb saba gayen al kura gama ma irde hi al gobe alyen saba pel irhem usi tenbe Al Kurun, Holi Spirit dunyin al gote saba goyen pel irde hi.

⁹Be, denbe bitinde mat kadom amanen nurd gunen tej hinayin yey Al Kurun beley saba dirtin geb, goke asande gar sopte ma momon dirtek yey nurde hite. ¹⁰Irde fudinde wor po denbe kadin yago Yesuyen alya bereya Masedonia nana bana han kurun goyen goke bitinde mat amanen nurde faran yurde han yen. Ningeb, kadne yago, matatin gobe gwahade po tej hinayin. Irkeb kun kurun hiyyen yey gago dinen teban dirde hite.

¹¹Irde dintirin gwahade po, kenkela hen hiburnen ma hinayin. Irde det kura denya denya mon goyen goke tonantin hilwa ma yirde hinayin. Irde kumhaka hen al haniy doyan po ma hinayin. Dindiken ge nurde meten tej hinayin. ¹²Gogab Yesuyen alya bereya mon sinare han mar beley denenbe palap dirde hinayin. Irde det kuran nurde al hoyan hitte faran nin ma nankenen hinayin.

Al kamtin gobe kame huwarnayin geb goke bulun wor po ma nurde hinayin

¹³⁻¹⁴Be, kadne yago, nenbe fudinde Yesube kamyinde mat huwaryin yey nurde hite. Ningeb gwahade goyen po yey ge dufaymin sanin irde kamtin mar goyen Al Kurun beley Yesu wayyen nalureb yisan hiyyen yey nurde hite. Ningeb al kamtin mar goke yitin mere fudinde goyen den beley nurde bebak tiwon yey nurde hite. Gogab Al Kurun nin ma nurde han mar beley al kamtin gobe epte ma huwarnayin yey nurde al kamtin goke buninen nurde esen han yen gwahade ma tej hinayin. ¹⁵⁻¹⁷Be, al kamtinde mat huwarnayin goke Doyan Al Kurun beley yingen mohonde yirin goyen momon dirnin tihit. Doyan Al Kurunbe Al Kurunyen gasunde mat mulgan hen katyen goyarebe al kamtin goyen kuware, “Huwarnan!”

yinyen. Irkeb Al Kurunyen miyon gote kurunmin beley wor gwahade po yinyen. Irkeb Al Kurunyen bigul mere tiyyen. Irkeb al Yesu Kristu nurd uney ga kamtiy mar go wa huwarnayin. Go kamereb mel goya Yesu Kristuyen alya bereya diliy gergen hinayin goya tumnan Al Kurunyen tarey beley yade hurkukeb nana kota kigarinjin faykek hende hurkun Doyan Al Kurun tupi tinayin. Gwaha ten gab yenya huginen hinayin. Ningeb Doyan Al Kurun wayyen goyenter al diliy gergen hinayin marbe igiy hinayin munay bikken kamtiy marbe igiy ma hinayin yey ma nurde hinayin. ¹⁸ Ningeb mere gayen dindigen uliy kadom momon gird tenbe tarey hej hej ge kadom faran gurd ten hinayin. Gogab kuratiy kura kamkeb huginen dubul tiya yey buninen ma nurde hinayin.

Yesu wan wan niy gitik ten hinayin

5 ¹⁻² Be, kadne yago, Doyan Al Kurun wan wan nalu gobe kawe al beley watin yara tiyyen gwahade goyen po, yey wor nalu goyare wayyen yey ma nurde hikeya wayyen goyen denbe kenkela nurde han gogo. Ningeb Doyan Al Kurun wan wan nalumin goke asande gar sopte katek yey ma nurde hite. ³ Be, al megen niy kurun gabe, 'Kanduk minmon, igiy ala po hite,' yey nurde hikeya kanduk kurun gore wan bemel po bulun wor po yiryen. Gobe bere biy yan kura diriy kawan kertek hej uliy misiyan katiy yara gwaha mat kura busahartek mon henayin.

⁴ Goyenpoga, kadne yago, denbe megen niy mar kidoma bana han gwahade mon geb, Yesu wan wan nalu gobe kawe al beley bemel po watinen dirkeb hurkunat ma tinayin. ⁵ Denbe Doyan Al Kurun gama irde han geb, matatinya dufaytinyabe igiy wor po. Al farende hej det kenkela yenen beley kun han go gwahade goyen han. Fudinde wor po, nenbe megen niy mar kidoma bana han gwahade mon. Mel gobe kidoma bana hej det kenkela ma yenen han go gwahade tintunen wor po han.

⁶ Ningeb nenbe Doyan Al Kurun mulgan hej hej niy ma nurde han mar beley mata bulun ten han gwahade ma ten hitek. Irde Ungura beley tunan durde bulun dird dird mata goke kenkela nurde ga hitek. Irde ulnininde po aman hetek mata fole irde hitek.

⁷ Munan Doyan Al Kurun ma nurde uney han marbe al wawun ferd ug po hej nana migirin ma nurde han go gwahade goyen, Satan beley lom yirde bulun yirde hiyen goyen bebak ma ten hanyen. Irde mel gobe al wawun fe nene kukuwa hej hanyen go gwahade goyen po, megen niy mata ten ten dufay hika titek mon geb, go po gama irde kun kun bulun hej hanyen.

⁸ Gega nenbe al gwahade mon. Nenbe Doyan Al Kurunyen mere gama irde hiten geb, al farende beley kenkela kenen kun hanyen go gwahade goyen po, hej hegninin manan igiy po hiten. Ningeb ulnininde po aman

hetek dufay fole irde Doyan Al Kurun niŋ hekkeŋ nurdeb Al Kurunya al hoyanya bininiŋde mat wor po amaneŋ nurde yunenŋ hitek. Mata gobe fulena mar beleŋ kili misiŋ pet teŋ teŋ ain beleŋ po irtiŋ dumunŋde yerde hanŋen go gwahade geb, Satan beleŋ epte ma bulun diriyeŋ. Irde neŋbe Al Kurun beleŋ nalu funaŋde neŋ tumnaŋ dumulgaŋ tiyyeŋ yeŋ nurde goke doyan heŋ hitek. Go mata gobe fulena mar beleŋ kili misiŋ pet teŋ teŋ ge tonan aw yerde hanŋen go gwahade geb, Satan beleŋ epte ma bulun diriyeŋ. ⁹Munan Al Kurun beleŋ dumulgaŋ tiyyiŋ gobe beararmiŋ bana heŋ heŋ ge ma basiŋa diriyeŋ. Gwahade yarabe Doyan Al Kurun Yesu Kristu gama irteke dade diriŋen weŋ dire yeŋ basiŋa diriyeŋ. ¹⁰Yesu Kristube kame mulgaŋ heŋ wayyeŋya goyare neŋ al kura diliŋ gergeŋ hinayiŋya al kamtiŋya tumnaŋ yeŋya hugiŋeŋ heŋ heŋ goke teŋ kamiyeŋ. ¹¹Niŋgeb mata igiŋ teŋ hanŋen gwahade goyen po, Al Kurunyen mere keŋkela gama irtek yeŋbe saŋiŋ heŋ heŋ ge kadam faran gurd teŋ hinayiŋ.

Saba funaŋ

¹²Be, kadne yago, gor niŋ Doyan Al Kurunyen meteŋ mar deŋ doyan dirde saba dirde huwa diriŋ yeŋ meteŋ kurun teŋ haŋ mar goyen meremiŋ nurde palap yirde hinayiŋ yeŋ gago momoŋ dirde hite. ¹³Irdeb meteŋmiŋ goke bitiŋde mat amaneŋ nurde yunenŋbe turun yirde palap wor po yirde hinayiŋ. Irde dindikeŋ uliŋ wor kadam bulun nurde gunen ma teŋ awalikde igiŋ po hinayiŋ.

¹⁴Gega, kadne yago, deŋ bana goyen al kura kumhaka heŋ hike yenenŋbe saba yirde hayhay yirde hinayiŋ. Irdeb al kura kanduk yeneŋ kafura heŋ araŋ po yul yeŋ haŋ mar kura hike yenenŋbe faran yurde tareŋ yirde hinayiŋ. Irdeb megeŋ niŋ mataya dufay bulunya pel ird ird tareŋ miŋmoŋ mar kura yenenŋbe go mar goyen wor faran yurde hinayiŋ. Irde kadtiŋ kura matamiŋ igiŋ hewoŋ yeŋ doyan heŋ heŋ ge piŋeŋ ma heŋ hinayiŋ. ¹⁵Irde deŋ kurun goyen al hoyan beleŋ bulun dirke wol ma heŋ hinayiŋ. Gwaha titneŋbe kadtiŋya al hoyanya goyen tumnaŋ igiŋ igiŋ yird yird niŋ kurut yeŋ hinayiŋ.

¹⁶Irdeb kanduk yeneŋ hinayiŋ ma kanduk ma yeneŋ hinayiŋ nalure goyenbe hugiŋeŋ aman hende po hinayiŋ. ¹⁷Irdeb Al Kurunya mere teŋ teŋ niŋ bada ma henayiŋ. ¹⁸Irdeb nalu igiŋde po ma Al Kurun igiŋ nurd uneŋ hinayiŋ. Nalu igiŋya bulunya waŋ hiyeŋ goyenbe hugiŋeŋ gwahade po teŋ hinayiŋ. Mata gwahade teŋ hinayiŋ yitiŋ kurun gobe deŋ Yesu Kristuya haŋ mar beleŋ gama irde hinayiŋ yeŋ Al Kurun beleŋ dunyiŋ geb, mata goyen po teŋ hinayiŋ.

¹⁹Irde Holi Spirit beleŋ bitiŋ bana heŋ meteŋ tike okohom po yeŋ ge naŋa mala teŋ unnayiŋ. Gwaha ma tinayiŋbe kak isikamtiŋeŋ irke meteŋ ma tiyyeŋ. ²⁰Irdeb Al Kurun beleŋ al kura hard unke mere tike keneŋbe

det karimneŋ kura yeŋ ma nurnayiŋ. Det kuruŋ wor po momoŋ dira yeŋ nurnayiŋ. ²¹ Goyenpoga al kura beleŋ, “Holi Spirityen saŋinde mere teŋ hite, irde meteŋ teŋ hite,” yeke yeneŋbe fudinde ma dahade goyen keŋkela yeneŋ bebaŋ teŋ hinayiŋ. Irdeb fudinde yeŋ kenem gama irde hinayiŋ. ²² Irde mata buluŋbe tumŋaŋ gama ma yirde hinayiŋ.

²³ Be, Al Kuruŋbe bininiŋ kamke igiŋ heŋ heŋ dufay duneŋ duneŋ al. Niŋgeb yeŋ beleŋ deŋ tareŋ dirke diliŋde wukkek igiŋ wor po hiwoŋ yeŋ nurde hite. Irde bitiŋ, dufaytiŋya ulitiŋya goyen igiŋ wor po hekeb Doyaŋ Al Kuruŋniniŋ Yesu Kristu waŋ waŋ nalureb gwaha mat kura mere ulitiŋde irtek miŋmoŋ hiwoŋ yeŋ nurde hite. ²⁴ Deŋ hoy dirde hi al Al Kuruŋbe deŋ gwaha direŋ yeŋ biŋa tiyiŋ goyen biŋ sir ma yeŋ hiyen. Niŋgeb meremiŋ go po gama irde yiŋgeŋ diliŋde wukkek diryeŋ.

²⁵ Be, kadne yago, neŋ ge nurde Al Kuruŋ gusuŋaŋ irde hinayiŋ. ²⁶ Irde kadniniŋ yago Yesuyen alya bereya hoyaŋ kura goyen yeneŋbe neŋ beleŋ yeŋ ge dufay heŋ hityen goyen momoŋ yirnayiŋ. ²⁷ Irde asaŋ kaŋ dunhem gabe kadtiŋ yago Yesuyen alya bereya tumŋaŋ kapyan heŋ yunnayiŋ yeŋ gago Doyaŋ Al Kuruŋ diliŋ mar mere tareŋ po dirde hime.

²⁸ Be, Doyaŋ Al Kuruŋniniŋ Yesu Kristu beleŋ buniŋeŋ dirde igiŋ igiŋ diryeŋ yeŋ gusuŋaŋ irde hime. Gogo po.